

PEDi manfaat 15.4 juta penduduk luar bandar

BH - 22/11/2021 m/s: 2

Usaha kerajaan pacu agenda negara sebagai persediaan kemajuan Malaysia


Oleh Zanariah Abd Mutalib dan Roselan Ab Malek
bhnews@bh.com.my

Bera: Kewujudan Pusat Ekonomi Digital Keluarga Malaysia (PE-Di) di seluruh negara memberi kemudahan kepada 15.4 juta penduduk, terutama golongan B40 dan masyarakat luar bandar.

Perdana Menteri, Datuk Seri Ismail Sabri Yaakob, berkata PEDi adalah antara usaha kerajaan bagi memacu agenda negara, sebagai persediaan menampilkan kemajuan Malaysia apabila ia beralih kepada kuasa ekonomi digital di rantau ini, tidak lama lagi.

“Kerajaan yakin usaha ini bukan saja akan merapatkan jurang digital tetapi juga akan mencetuskan inovasi digital yang boleh memacu hasrat negara membangunkan agenda ekonomi digital.

“Ini aspirasi negara untuk mengubah Malaysia menjadi sebuah negara berpendapatan tinggi, yang didorong oleh digital dan pemimpin serantau dalam eko-



Ismail Sabri diiringi Annuar (tiga dari kanan) melawat pusat Ekonomi Digital Keluarga Malaysia selepas Pelancaran PEDi di Bera, semalam.

[Foto BERNAMA]

nomi digital.

“Selaras dengan matlamat Keluarga Malaysia yang menekankan nilai keterangkuman, kebersamaan dan kesyukuran, kerajaan akan memantau secara dekat pelaksanaan program dan inisiatif yang dirancang,” katanya.

Beliau berkata demikian ketika melancarkan PEDi di Bera, semalam.

Yang turut hadir, Menteri Komunikasi dan Multimedia, Tan Sri Annuar Musa; Menteri di Jabatan Perdana Menteri (Ekonomi), Datuk Seri Mustapa Mohamed dan Menteri Besar Pahang, Datuk Seri Wan Rosdy Wan Ismail.

Perdana Menteri berkata, se-

banyak 873 PEDi sedia ada akan dipertingkatkan dan dipergiatkan sebagai pusat sehati untuk kegiatan ekonomi digital luar bandar.

Katanya, setiap pusat itu akan dilengkapi akses perkhidmatan jalur lebar, kemudahan infrastruktur digital serta kakitangan terlatih untuk memberi perkhidmatan serta sokongan yang diperlukan komuniti setempat.

Selain itu, beliau berkata, sebanyak 37 PEDi baharu akan dibuka pada suku pertama 2022, manakala 173 PEDi lagi akan beroperasi menjelang hujung tahun depan, menjadikan keseluruhan 1,083 PEDi, yang akan beroperasi di seluruh negara.

Perdana Menteri memaklumkan, sehingga akhir tahun lalu, terdapat hampir 1.2 juta perusahaan mikro kecil dan sederhana (PMKS) di negara ini atau 97.2 peratus daripada jumlah keseluruhan perusahaan, namun sebahagian besarnya masih kurang berdaya saing serta perlu diperkasa, selepas terjejas akibat pandemik COVID-19.

“Melalui program pemerkasaan usahawan kecil diterajui Suruhanjaya Komunikasi dan Multimedia Malaysia (SKMM) ini, dengan kerjasama agensi dan pemain industri, kerajaan menyasarkan 800,000 usahawan kecil akan mendapat manfaat menjelang 2025,” katanya.